

A *rubá***A** *ntaño*

RECORDANDO GARDEL 56 AÑA DI SU DESAPARICION

CARLOS GARDEL tambe ta den nos ARUBA ANTANO, ya cu prome cu e accidente trágico na Medellin, Colombia, di dia 24 di Juni 1935, Gardel tabatin dos presentacion gaucho na Aruba, di cual uno tabata den Teatro Royal na San Nicolas, cu despues a bira Teatro Principal y e otro den Teatro Gloria na Playa, yama den boca di pueblo "Cura'i Cabay".

E asina yamá Patron Gaucho Argentino Gardel a yega Aruba bordo di Snip un di e proménan di KLM den e region



aki, bistir cu carson bayete, zapato preto cu blanco, na e terminal di vliegveld cu tabata un barak color berde, y for di unda tambe a bin nace e nomber di Dakota, durante e segunda guerra mundial.

Gardel a hospedá den Hotel Strand den Wilhelminastraat, y for di eyan tambe a tuma Max un enano bonereano como su mascota. Cu Gardel ariba Aruba, a drenta tambe un kick den hopi hende dor di e estilo di su peinado.

Hasta tin cu mester a plaquea e cabeì cu rees, otro a haya e nomber di dje tambe, pero tambe otro a ser inspira pa lanta un grupo bao di e nomber di Los Trovadores. E integran-tenan di esaki tabata Clemente Lacle (q.e.p.d.) cantante hunto cu Shemmy Coronel, Juan Eusebio Croes, Boye, Harold y otro mas. For di akinan nos a bin haya uno, tremendo bon den voz y interpretacion di e tango rioplatense, cu ta Tali Lopez (q.e.p.d.).

Despues di Gardel su dos funcionnan ariba Aruba, el a sali pa Colombia unda e tabatin presentacionnan den diferente parti di Colombia. Pero destino a pone cu e unico presentacion aya nan tabata na Medellin, y dor di e trágico accidente cu a tuma lugar e otronan no por a ser cumpli.

E trágico accidente a tuma lugar dia 24 di Juni 1935 pa 2'or di atardi na e momento cu e F-13 trimotor a bai na e extremo di e pista, pero a sali for di esaki y bai dal den un otro F-13, cu tabata spera su turno pa lanta vuelo.

E boksmento (choke) di e dos avionnan tabatin un impacto cu instantaneamente tur dos a pega candela, y casi tur e ocupantenan a muri carbonizá. E resto di Gardel a ser reconoci dor di su camisa, su pasaporte cu a ser haya den su saco mitar kimá, y un chapa cu ta bisa: Carlos Gardel, Juan Juarez 735, Buenos Aires.

Hunto cu Gardel a muri Alfredo Lepera, Angel Riverol, Guillermo Barbieri, Alonso Azzaf, Celedonio Palacios y Jose Corpas Moreno.

Dos aña despues di e tragedia di Medellin, e restonan mortal di Carlos Gardel a ser hibá Buenos Aires, hunto cu esnan di su compañeronan.

Gardel a graba su prome disco na aña 1917 y na unda e compania ODEON a yama esaki "Cantar Eterno". Gardel a cubri e trayectoria mas brillante di e cancion rioplatense. For di su labionan a sali e versionan cobra dor di su forza emocional maxima, pasobra e tabata duna e calor na esakinan cu su voz criollo, varonil y bunita. El a haci gala di un inspiracion fecundo cu a duna e musica rioplatense cancionnan cu lo no muri nunca.